

Jarraian, Pili Kaltzadak *Deia* egunkarian idatzitako artikulua irakurriko duzu.

Egitekoa

Irakur ezazu artikulua, eta ondoren idatzi erantzunak laukian, adibidean egiten den bezala.

Sei segundo



Pili Kaltzada

Egunotako hotzarekin minutu batetik gora behar izaten dut autoa martxan ipintzeko. Huskeria, nolanahi ere. Zeren eta, zer da minutu bat? Ezertxo ere ez. Edo bai. Nire autoak erantzuteko behar duen minutu horretan, hamar ume hil egingo dira munduan. Beste horrenbeste gertatuko da goizean hartuko duzun autobusera igo eta martxan jarri bitartean. Kafea eskatu eta azukrea nahasteko behar duzun denboran, berdin-berdin. Baita zutabe honen bigarren paragrafora iristeko behar duzun denbora-tartean ere.

Action Aid izeneko erakundeak eman du datua, eta ez dut zertan zalantzan jarri. Munduan mila milioi lagun gosetu omen daude gaur egun, eta kopuru hori haziz joan da gosearen egoerari kontu hartzen hasi zitzaionez geroztik. 2005. urtetik hona ehuneko hogei handitu da kopuru hori. Lehen baino gose gehiago dago gaur egun munduan; inoiz baino gose handi, ikaragarri eta zabalago. (Honaino iristean hamar haur hil egin dira, irakurtzen hasi zaren unean bizirik zeudenak).

Harrigarri gertatu izan zaizkit beti era honetako zenbaki borobilak, zelan kalkulatzeko dituzten ez baitakit. **Txitean-pitean** ezagutarazten dizkigute horrelakoak, baina kalkuluaren nolakotasuna gutxienekoa da kasu honetan. Izan ere, datuen zehaztasuna **gorabehera**, asko dira, gehiegi, ustez aurreratua den mundu honetan gose diren herritarrek.

Nire facebook-eko auzoan bizi den adiskide batek galdetu zuen bere horman aurreko domekan: “noiz egingo dugu **basakeria** hau salatzeke manifestazio handia?”. Protesta egitea merezi duela pentsatu dut, baina ez daukat batere argi noren kontra altxatuko genukeen gure ahotsa. Laguntzarik askatzen ez duten gobernuen aurka? Bai noski. Elikagaien ordez armak esportatzen dituzten enpresen kontra? Jakina. Eta automobila axolagabe pizten dugunon aurka? Geure **erosotasuna ezbatan jartzen** ez dugunon aurka? Geure garapenaz bestalde den gose **barkaezina** geldiarazteko ezertxo ere egiten ez dugunon kontra?

Adibidea:

0. Zertan ari da idazlea testuaren hasieran?

- a. Eguneroko zereginetan.
- b. Denbora-pasa ari da.
- c. Denbora irabazi nahian ari da .

1. Zer gertatzen da minutu batean?

- a. Gertaera larriak eta egunerokoak.
- b. Garrantzi gutxiko gertaerak.
- c. Zutabea irakur daitekeela.

2. *Action Aid* erakundeak zer dio?

- a. Datuetan gorabeherak ikusi direla.
- b. Goseari neurria hartu zaiola.
- c. Goseak gora egin duela.

3. "Txitean-pitean" erabiltzen duenean, zer adierazi nahi du?

- a. Zenbakiak noizean behin jakinarazten direla.
- b. Zenbakiak isilka ematen direla aditzera.
- c. Zenbakiak garrantzi gutxi dutela.

4. Datuen zehaztasuna "gorabehera" esaten duenean, zer esan nahi du?

- a. Datuen zehaztasunean gorabehera handiak daudela.
- b. Datuak zehatzak izan ala ez, adierazgarriak direla.
- c. Datuei zehaztasuna falta zaiela.

5. "Basakeria" hitzak zeri egiten dio erreferentzia?

- a. Manifestazioa egin behar izateari.
- b. Gosez hildakoak zenbaki hutsak bihurtzeari.
- c. Gosearekiko gure axolagabekeriarri.

6. "Erosotasuna ezbalan jartzea" zer da?

- a. Gure bizimodua zalantzan jartzea.
- b. Gure erosotasuna baztertzea.
- c. Gure bizimodua goraipatzea.

7. Zergatik dio gosea "barkaezina" dela?

- a. Goseak ez duelako barkatzen.
- b. Gosea ez zaiolako onargarria iruditzen.
- c. Goseak daudenek ez digutelako barkatuko.

Aukera ezazu erantzun egokia eta jar ezazu dagokion letra ondoko laukietan:

0.- a	1.-	2.-	3.-	4.-	5.-	6.-	7.-
-------	-----	-----	-----	-----	-----	-----	-----